

蟹谱 宋 傅肱

提要

卷上

卷下

提要

《蟹谱》二卷，宋傅肱撰。肱字自翼，其自署曰怪山。陈振孙谓怪山乃越州之飞来山，则会稽人也。其书分上、下两篇，前有嘉佑四年自序。而下篇贪花一条，又引神宗时大臣赵姓者出镇近辅事，而讳其名。考《宋史》惟神宗熙宁初枢密使参知政事赵概尝出知徐州，似即其事，则嘉佑当为元佑之讹。然《书录解题》亦载是序为嘉佑四年，而赵概为北宋名臣，亦不容着贪墨声，或刊本神宗字误也。书中所录皆蟹之故事，上篇多采旧文，下篇则其所自记。铨次颇见雅驯，所引《唐韵》十七条，尤足备考证。盖其时孙愐原本尚存，故肱犹及见之云。

卷上

蟹之为物，虽非登俎之贵，然见于经、引于传、着于子史、志于隐逸，歌咏于诗人，杂出于小说，皆有意谓焉。故因益以今之所见闻，次而谱之。自总论而列为上下二篇，又叙其后，聊亦以补博览者所阙也。神宋嘉佑四年冬序。

总论

蟹，水虫也。其字从虫【盱鬼反】，亦曰鱼属，故古文从鱼作蟹。以其外骨则曰介虫，取其横行目为螃蟹焉。骨眼蝟腹，口〈虫匡〉脑蚩足，其爪类拳丁，其口〈敖上骨下〉类执钺，匡跪又皆外刺。性复多躁，或编诸绳缕，或投诸笊簪，则引声嚙沫，必死方已。类皆口〈鱼隋〉育，生于济郛者其色绀紫，出于江淞者其色青白。【此举其所育多者尔，凡有水之地，不无此味。】小者谓之螯蛆，中者谓之蟹匡，长而锐者谓之蟹，【音截】甚大者谓之螯蚌。虽皆有佳味，独蟹参于药论耳。明越溪涧石穴中亦出小蟹，其色赤而坚，俗呼为石蟹，与生伊洛者无异。庵圆多腴而夺之口〈敖上骨下〉，脐长多瘠而与之虾。其生于盛夏者，无遗穗以自充，俗呼为芦根蟹。【谓其止食茭芦根】瘠小而味腥，至八月则蜕形。已蜕而形浸大，秋冬之交稻梁已足，各腹芒走江，俗呼为乐蟹，最号肥美。由江而纳其芒于海，中之魁遇冰雪则自伏淤淀，不可得矣。今人设啖具以案酒者，此特为之先置焉。江淮间尚推重如此，况非所育之地乎。【何曾食蔬，弘君食橄，虞惊饮食，亦未必不珍此味也。虞惊南史有传，但名存而书亡，此为恨耳。】

曰螯蛆者，二月、三月之盛出于海涂。吴俗犹所嗜尚，岁或不至，则指目

禁烟，谓非佳节也。今之通泰，其类实繁，然有同螯口〈虫越〉差大而毛，好耕穴田畝中，谓之螯螞，毒不可食。晋蔡道明误食之几死，尤宜慎辨也。又多生于陂塘沟港秽杂之地，往往因雨则濒海之家，列阵而上，填砌縁屋，虽驱拂之不去也。噫！蟹虽微类，至于腹芒以朝其魁，其得自然之礼欤。嗜欲已足，舍陂港而之江海，其得自然之智欤。虽外刚躁而内无他肠，其得自然之正欤。岂独以其滋味饜世人之口腹哉。故论其畧而冠诸二篇之首。

### 上篇

离象 有匡 仄行 蝟蟻 走迟 虫孽 性躁 左持 捕鼠 不啖 郭索  
螯螞 诛解系 蛙矜 龟长 侈味 琐口〈王吉〉 介虫之孽 无肠公子  
天文 食证 异名 诫嗜 兵异 集鼠 蚩类 浦名 画 输芒 蛉腹 同鼠  
孽 为菑 玉篇 月令 图经 琴声 唐韵 说文 长生 食菘 斩王攄 药  
证

### 离象

《易》之离，象曰：为螯、为蟹、为羸、为蚌、为龟。孔颖达云：取其刚在外也。

### 有匡

《檀弓》曰：成人有其兄死而不为衰者，闻子皋将为成宰为衰。成人曰：蚕则绩而蟹有匡，范则冠而蝉有綏，兄则死而子皋为之衰。孔颖达云：蟹背壳似匡。

### 仄行

《周礼》：梓人为篋簋。别叙：小虫，蟹属，以为雕琢。郑康成注云：刻画祭器，博庶物也。虫自外骨，至胷鸣，内有仄行者。释云：蟹属。贾公彦疏曰：今人谓之螃蟹，以其侧行者也。内郤行者螾口〈行外虫内〉之属，即由延也。脰鸣者即虾蟇也，紆行者即蛇也。案周礼祭器未有以由延、螃蟹、虾蟇及蛇为饰者，不知起何法制，且经文但云以雕琢耳，康成专取为祭器之饰，义诚安考？

### 蝟蟻

《尔雅》释鱼篇云：蝟蟻，小者螾。【螾，螺属，见埤苍。或曰即蝟也，似蟹而小。】

### 走迟

《大司乐》：乐，六变。注：蛤蟹，走则迟。

### 虫孽

越王勾践召范蠡曰：“吾与子谋吴，子曰未可也，今其稻蟹不遗种，其可乎？”【注：蟹食稻。】对曰：“天应至矣，人事未尽也，王姑待之。”

性躁

《荀子劝学篇》云：蟹六跪而二螯，非蛇蟪之穴无所寄托者，用心躁也。

【注：跪，足也。螯，蟹首上如钺者。序语蟹皆八足，此云六者，谬文。然今观蟹行，后两小足不着地，以其无用，所畧而不言。】

左持

晋春秋毕吏部：卓字茂世，尝谓人曰：左手持蟹螯，右手执酒杯，拍浮酒池中，足乐一生哉。

捕鼠

《淮南子》曰：使蟹捕鼠必不得。

不啖

虞预《会稽典录》云：吞舟之鱼，不啖鰕蟹。【《玉篇》作鰕，长须虫也。】熊虎之爪，不剥狸鼠。

郭索

《太玄》：锐前一蟹之郭索，后蚓黄泉。【范明叔云：一水也所称泉，亦为水所称蟹，五为裸所称蚓，言蟹之与蚓者，用心之不一，虽有郭索多足之蟹，不如无足之蚓者，以其用心之一也。】

螯基

《晋书》：蔡谟字明道，初渡江，见螯基大。喜曰：蟹有八足，加以二螯，令烹之。既食，吐下委顿，方知非蟹。后诣谢尚而说之。尚曰：卿读《尔雅》不熟，几为劝学死。

诛解系

晋解系字少连，与赵王伦同讨叛羌。时伦信用佞人，孙秀与系争军事，更相表奏。朝廷知系守正不挠，而召伦还。系表杀秀以谢氏羌，不从。后伦、秀以宿憾收系兄弟，梁王彤救系等。伦曰：“我于水中见蟹且恶之，况此人兄弟轻我邪。”遂害之。

蛙矜

《庄子秋水篇》：公子牟曰：子独不闻夫埴井之鼃乎？谓东海之螯曰：“吾乐与！吾跳梁乎井干之上，入休乎阙瓮之崖，赴水则接掖持颐，蹶泥则没足灭跗，还虿【音寒，义云井中赤虫，一名蝮。】蟹与科斗，莫吾能若也！”

龟长

《大戴礼》云：甲虫三百六十四，神龟为之长，蟹亦虫之一也。

侈味

《南史》：何胤字子季，出继叔父旷所，更字胤叔。初胤侈于食味，前必

方丈，后稍欲去。甚者犹食白鱼□〈鱼旦〉【市演反】、脯糖蟹，以为非见生物，拟食蚶蛎，使门人议之。学生锺岷曰：□〈鱼旦〉鱼就脯，骤见屈伸。蟹之将糖，躁扰弥甚。仁人用意深懷此怛，至于车螯蚶蛎，眉目内阙，惭浑沌之奇犷，殼外緘非金人之慎。不悴不荣，曾草木之不若。无馨无臭，与瓦砾其何殊。故宜长充庖厨，永为口实。

琐□〈王吉〉

郭景纯《江赋》云：“琐□〈王吉〉腹蟹，水母目虾。”又《松陵集》注云：琐□〈王吉〉似蚌，常有一小蟹在腹中为□〈王吉〉出求食，蟹或不至，□〈王吉〉馁死。所以淮海人呼为蟹奴。

介虫之孽

《月令》章句曰：介者，甲也。谓龟蟹之属。【后汉五行志】

无肠公子

《抱朴子》云：山中无肠公子者，蟹也。

天文

《释典》云：十二星宫有巨蟹焉。

食证

孟诜《食疗本草》云：蟹虽消食，治胃气、理经络，然腹中有毒，中之或致死，急取大黄、紫苏、冬瓜汁解之，即差。又云：蟹目相向者不可食。又云：以盐渍之，甚有佳味，沃以苦酒，通利支节，去五脏烦闷。【予谓亦不可与柿子同食，发霍泻。】

异名

《中华古今注》云：螯蛎，小蟹也。生海涂中，食土。一名长卿，其一螯偏大者为拥剑，一名执火。

诫嗜

《混俗颐生论》曰：凡人常膳之间，猪无筋、鱼无气、鸡无髓、蟹无腹，皆物之稟气不足者，不可多食。

兵异

《军畧灾篇》云：地忽生蟹，当急迁砦栅，不迁，将士亡。

集鼠

陶隐居云：僊方以黑犬血灌蟹，三日烧之，诸鼠毕集。

蜃类

郭景纯传山海经云：蜃形如惠文冠，青黑色，十二足，长五六尺，似蟹。雌常负雄而行，渔者取之必双得。即吴都赋所谓乘蜃者也。吕延济亦注云似蟹。

## 浦名

南齐建武四年，崔慧景作乱到都下。【今之金陵】不克，单马至蟹浦，投渔人太叔荣之，荣之故为慧景门人，时为蟹浦戍，因斩慧景头纳鳅篮中，送都下焉。

## 画

唐韩晋公滉善画，以张僧繇为之师，善状人物、异兽、水牛等，尤妙于螃蟹。

## 输芒

孟诜《食疗本草》云：蟹至八月即啖芒，两茎长寸许。东向至海，输送蟹王之所。陶隐居亦云：今开蟹腹中，犹有海水，乃是其证。予谓即陆鲁望云执穗，以朝其魁者也。与夫羔羊跪乳，蜂房会衙，俱得自然之礼。

## 蛉腹

《唐韵》况字，逋翁混胎丈人摄魔还精符曰：螟蛉之子，虾目蟹腹，即即周周，两不相掩，此之谓体异而气同。

## 同鼠孽

唐陆龟蒙字鲁望，作《稻鼠记》，引《国语》曰：今吾稻蟹不遗种，岂吴人之土鼠与蟹更俟其便而効其力，殲其民欤？

## 为菑

晋《隐逸传》，夏统字仲御，会稽永兴人也。幼孤贫，养亲以孝睦闻。初兄弟每采椽求食，星行夜归，或至海边采蠨蛸（虫越）以自资养。

## 玉篇

八足【蟹二螯八足】□（虫不）【普流反，似蟹二足，亦见郭璞江赋。】  
蝓□（虫尊）【上方武下布莫反，皆蟹也。】

## 月令

季冬行秋令，介虫为妖。【丑为螯蟹】

## 图经

罗处约《新修苏州图经鸟兽虫鱼篇》，蟹居其末。

## 琴声

《琴谱履霜操》有蟹行声。

## 唐韵

螯蝓【户八反，似蟹而小。予谓即今之螯蛸也，一名螯蝓耳。】□（虫兀）  
【王忽反，蛤属，似蟹。】蟹【水虫也。】蝓蛸【上自秋下莫浮，似蟹而大，生海边。】蟹【似蟹，生海中。予谓于食品中与苣胜胡麻相宜。】螯【蟹属。】□（敖上骨下）【蟹大时也，予谓古今用□（敖上骨下）跪字通作螯。】

螃【螃蟹，释云本蟹云，俗加螃字。予案周礼疏推作旁，取其横行，今字益虫，乃是俗加。陆德明所谓虫属，要作虫旁，草类皆从两中，是也。然则旁蟹之呼名古矣，但不当加虫字耳。予谓今秀州华亭县济村所出甚多小者，谓之黄甲，越人云和盐泥养之可踰月。】□〈鱼折〉𩺰【下音功，江虫也，形似蟹可食，又音炔。】□〈鱼良〉□〈鱼岂〉【下音孩，雄蟹也。】𩺠【胡安反，𩺠蟹，一名蚱虫。】拥剑【剑虫，形似蟹。崔豹《古今注》折剑，一名执火，其螯赤，谓之执火。】𩺡【蟹子也，以水反，又他果切。】𩺢【蟹腹下𩺢，于琰反。】𩺣【盐藏蟹，事夜切。】江□〈虫折〉【寺絶反，似蝓蚶，生海中。】□〈北上虫下〉【虫，似蟹四足，音北。】

### 说文

六足【许慎说文云：蟹，六足二螯者也。】𩺤【九毁切，唐韵云：兽似龟，白身赤首。】胥【相居切，蟹醢也，唐韵从虫盐藏之。】

### 长生

陶隐居云：僊方投蟹于漆中，化为水，饮之长生。

### 食茛

陶隐居云：蟹未被霜者，甚有毒，以其食水茛也。人或中之，不即疗则多死。至八月，腹内有稻芒，食之无毒。

### 斩王攄

《晋书》：刘聪字符明，即伪位左都水使者，襄陵王攄坐鱼蟹，不供，斩于东市。

### 药证

《本草》云：蟹𩺣，味咸，性寒，有毒。主胷中邪气热结，痛啞僻音建面肿，解结散血，愈漆疮，养筋益气。取黄以涂久疽疮，无不差者。又杀茛菪毒，其爪尖主破胞堕胎。《陈藏器本草》云：人或断绝筋骨者，取胫中髓及脑与黄微熬纳疮中，即自然连续。《海药本草》云：石蟹，案广州记云：出南海，祇是寻常蟹，年深岁久，日被水沫相抱，因兹化成石蟹。每遇海潮，即飘出。又有一般者，入洞穴年深，亦成石蟹。味咸寒有毒，主消青盲眼浮翳，又主眼涩。皆细研水飞入药，相佐用以点目。

## 卷下

### 下篇

孝报 殊类 贪化 采捕 泉比 兵证 贡评 风虫 郁洲 食品 恠状  
断弊 蟹杯 令旨 蟹户 兵权 蟹征 螺化 食珍 蟹浪 酒蟹 白蟹  
荡浦摇江 纪赋咏

## 孝报

初，杭俗嗜蟹而鄙食蟹。时有农夫田彦升者，家于半道，幼性至孝。其母嗜蟹，彦升虑其邻比窥笑，常远市于苏湖间，熟之以布囊负归。俄而杨行密将田頔【于伦切】兵暴至，乡人皆窜避于山谷，粮道不接，或多饿死，独彦升挈囊负母竟以解免，时人以为纯孝之报焉。

## 殊类

震泽渔者陆氏子，举网得蟹，其大如斗，以口〈敖上骨下〉剪其网皆断。陆氏子怒欲烹之，其侣老于渔者，遽进曰：“不可，吾尝闻龟蟹之殊类甚者，必江湖之使也，烹之不祥。”乃从而释之，蟹至水面，横行里许方没。

## 贪化

神宗朝，有大臣赵氏者【名某】，虽于国功高，然其性贪墨，私门子弟苞苴，上特优容之。一日因锡宴，上召伶官使谕己意。伶者乃变易为十五郎姓旁，因命钓者，俄一人持竿而至，遂于盘中引一蟹。十五郎见而惊曰：“好手脚长，我欲烹汝，又念汝是同姓，且释汝。”翌日，赵果出镇近辅。

## 采捕

今之采捕者，于大江浦间承峻流环苇帘而障之，其名曰断。【音锻】于陂塘小沟港处，则皆穴。沮洳而居，居人盘黑金作钩状，置之竿首，自探之。夜则燃火以照，咸附明而至焉。【若鱼以饵而钓之。】

## 泉比

煎茶之法，视其泉若蟹目然，鱼鳞然，第一法。

## 兵证

吴俗有虾荒蟹乱之语，盖取其被坚执锐，岁或暴至，则乡人用以为兵证也。

## 贡评

国家贡口实于远方者，蛤蜊亦贡焉，独蟹不贡。议者以为贡不贡固有差品，予谓非也。蛤蜊止生于海涂，迩京州郡无有也。故须上供旁蟹，盛育于济郛，商人辇负轨迹相继，所聚之多不减于江淮，奚烦远贡哉。予尝见监御厨王染院云：御食经中亦有煮蟹法，但不常御，锡命则进耳，非谓无录而不在贡品。

## 风虫

蟹之腹有风虫，状如木鳖子而小，色白，大发风毒，食者宜去之。

## 郁洲

江淞诸郡皆出蟹，而苏尤多。苏之五邑娄县为美，【即昆山也。】娄县之中生郁洲吴塘者又特肥大。【郁洲即孙恩所保之地。】

## 食品

北人以蟹生析之，醑以盐梅，芼以椒橙，盥手毕，即可食，目为洗手蟹。

恠状

吴沈氏子食蟹，得背壳若鬼状者，眉目口鼻分布明白，常宝翫之。

断弊

蟹至秋冬之交，即自江顺流而归诸海，苏之人择其江浦峻流处，编帘以障之，若犬牙焉。致水不疾归，而岁常苦其患者，有由然也。虽州符遣卒俾令弃毁，而吏民万端终不可禁。罗江东云：蛟蜃之为害也，则绝流不顾渔人之钩网。噫！水之病吴久矣，又非蛟蜃之比，绝流顾网其才识固自有小大哉。长民者能推而不疑，亦丰岁一助也。

蟹杯

其斗之大者，【匡一名斗。】渔人或用以酌酒，谓之蟹杯，亦诃陵云螺之流也。【诃陵酒，樽用鲎鱼壳，谓之涩锋鬘角，内玄外黄。《松陵集》：海南人目螺之有文者曰云螺，亦用以酌酒。】

令旨

艺祖时，尝遣使至江表，宋齐丘送于郊次。酒行语熟，使者启令曰：“须啖二物，各取南北所尚，复以二物，仍互用南北俚语。”使者曰：“先吃鱸鱼，后吃旁蟹，一似拈蛇弄蝎。”齐丘继声曰：“先吃奶酪，后吃乔团，一似嚏脓灌血。”时朝廷方草创，用度不给，倚江表为外府，故齐丘及之。左右以令逼，使之太甚，相顾失色，使者雅叹焉，故归朝而间行。

蟹户

钱氏间置鱼户、蟹户，专掌捕鱼蟹，若今台之药户、畦户，睦之漆户比也。

兵权

出师下砦之际，忽见蟹则当呼为横行介士，权以安众。

蟹征

按《周礼》人职掌渔征，入于玉府者，贵其须骨之用，以饰器物也。今鱼虽鯤鲈，以至虾蟹悉立征税之目，非若古人取须骨之意也。二浙运使沈公立以岁征权奏罢之，议者谓其识体。

螺化

海中有小螺，以其味辛，谓之辣螺。可食，至二三月间多化为螯蛄。今人有得螯蛄半成而尚留壳中者，此其证也。【近青龙镇于江涂中得蟹螯，蛄俱脱，其行自若。初惊为恠，及熟烹去壳，则将化为蝉矣。噫！物之变化万状，固不可究诘。今观蝉之首腹颇与蟹相类，诚亦有是，但虑惊浴又非予之所亲见，故附录之。】



食珍

凡糟蟹，用茱萸一粒置庵中，经岁不沙。

蟹浪

济郛居人夜则执火于水滨，纷然而集，谓之蟹浪。

酒蟹

酒蟹须十二月间作，于酒瓮间撇清酒，不得近糟，和盐浸蟹一宿，却取出于庵中，去其粪秽，重实椒盐讫，迭净器中。取前所浸盐酒，更入少新撇者同煎一沸，以别器盛之。隔宿候冷，倾蟹中，须令满。螯蛆亦可依此法，二三月间止用生干煮酒。

白蟹

秀州华亭县出于三泖者最佳，生于通陂塘者特大，故乡人呼为泖蟹。又亭林湖【近顾野王宅，乡人亦号为顾亭林。】于天圣末忽生白蟹，【即海中所生蟹是也，但蟹不生于淡水，今忽有因号白蟹。】濒江之人以价倍常，靡有子遗，止一年而种绝。

荡浦摇江

吴人于港浦间，用篙引小舟，沉铁脚网以取之，谓之荡浦。于江侧相对引两舟，中间施网，摇小舟徐行，谓之摇江。【上接断下接于陂塘】

纪赋咏

蟹志【见陆龟蒙集】

中躁外挠兮冠带之狙。【陆龟蒙赋】

蟹奴晴上临湘槛，燕婢秋随过海船。【皮日休】

蟹因霜重金膏溢，橘为风多玉脑圆。【同前】

二螯或把持。【杜子美】

亥日饶虾蟹。【白乐天】

病中有人惠海蟹转寄鲁望【皮日休】

绀甲青筐染落衣，岛夷初寄北人时。离居定有石帆觉，失伴惟应海月知。族类分明连锁□〈王吉〉，【琐□〈王吉〉，似小蚌，有一小蟹在腹中。□〈王吉〉出求食，故淮海之人呼为蟹奴。】形容好个是螯螟。病中无用双螯处，寄与夫君左手持。

酬袭美见寄海蟹【陆龟蒙】

药杯应阻蟹螯香，却乞江边采捕郎。自是扬雄知郭索，【太玄经云：蟹之郭索。】且非何胤敢餍餍。【何胤侈于食味，稍欲去其甚者，犹有□〈鱼旦〉脯糖蟹。】骨清犹是含春霭，沫白还疑带海霜。强作南朝风雅客，夜来偷醉早梅傍。